

Yakobus

Yesus, el weitnye koproba Yakobus arye, surat sekeiyamsuk yupu

Yakobus ara, Yesus wipdeiyamuk mapu sik 12 nang kan-kan kum ulamuk.

Yakobus minyuma ara, Yesus ati diba kum teneamuk (Yohanes 7:2-5). Bukni, aminyan talak ara, Yakobus arye Yesus ati, diba tenebukce, Yesus dobolbalamuk. Yesus ati, diba tenelamukce, aminyan talak Yerusalem mutuku diba tenelamik ninye, sik deiyoknye ton ulamuk (Galatia 2:9). Paulus arye Yerusalem mutuku biyuk talak ara, Yakobus ton epdarik (Galatia 1:19).

Yakobus arye, ‘Yahudi yala ninye diba tenelamik ninye arye, abuku dobuka bobikirye, ayupu diba tenepnamak’ tenen, abuk sekuk. Asurat doprobik ninye ara, Yahudi yala nang, Yerusalem mutuku ulamik ninye. Bukni, Yerusalem mutuku noutamak, tonoknye si ara Espanus, Yesus el laka teleb yupu peterebukba, malye nang arye keil dobuka, el nong deice cobuka obik. Atalak arye deiya koubuka diba tenena kum ninye arye, diba tenena ninye ati, ikin ning weik sik nong deice delilamik. Winilamikba, Yerusalem mutuku diba tenebik kili sal weika arye, amutuku batakuka, yuk-yuk mutuku bindobik. Aning ati ara, sik gereja deiyoknye Yakobus arye, ‘Sik kanye talima melipnamne’ tenen, abuku sekeibuk.

Yakobus arye, ‘Aning ara weik mambule’ tenen, sekeipsuk ning ara, ‘Yesus ati diba tenenyak ninye nirya, talye yupu deice arye, “Na diba tenenune,” nyaplobuka, talye-talye kum unamak bukni, dipkoprop diksukumuk unamak’ tenen, sekuk.

Yakobus arye, deiyok kouna ati, nyabuk yupu

1 ¹ Na Yakobus arye Yahudi yala nang 12 yala bokuka, yuk-yuk amutuku-amutuku umunce, diba tenelulum nang nirya ati, ayupu sekeipsene. Na Yakobus ara, nun Ni Allah ap, nun Deiyoknye Yesus ap, sik talipnirik ura, sik fil uk dobuka ununye birye, ayupu sekeipsene. Telebe nyapsine.

**Winilen ning usilye ning ap, kanye imun ning
usilye ning ap ati, nyabuk yupu**

²Na kayapu, Yesus dib teneluluma ati, nun du weit atonun ninyeo, kekepnuse. Kanye imun ning yala-yala weik upsilye talak niryra ara, teniltona kum, kanye teleb bobuka uk unamlulume. ³Ara, talye ati kume. Anggun kele, diba tenebibubuk, kanye imun ning usulula deice arye, diba tenenyap ning ara wisisulule. Wisipsilyop ura, batakna fia kum arye, diba tenena uk tenebibirye, fil fia palibuka don nang unamabe. ⁴Diba tenena uk ubuka, fil fia palibuka dolamibya ani, talima wisipsilyop ura, nun teleb ubuka un ning niryra ara, kum suktalipnamle, fia langdibuka telebuk unamsile.

⁵Anggun kan-kan noutamak arye, yata nang do niryra, teleb una ati, weik kele deiyok ning kum upmasylyop ura, Allah ati moronamlume. Sikce sik pataplye touk, Allah ati morobice nang ara, wenena kum arye talye urdem weika arye arilule anya arye, Allah arye dipkoprop arinamsile. ⁶Bukni, Allah moropnamlanye bira, kanye bokoltona kum arye, 'Dipkoprop aripnamnile' tenen, moronamle. Kanye bokoltonanye bira, weik mek laut mekwan fum arye lonting-lonting abliirye, mek kup-kup bini yana, kiplirye bolkeklamla atonun ulule. Winilula ati, diba tenena deice aryuk moronamlume.

⁷Kanye bokoltona uk ululnye bira, 'Allah arye aning-aning aripnamnile,' tenelul bukni, kum arinamimile. ⁸Atonye bira, el kanye talima tonok kum tenelirye, kanye bintinilule. El un ning noutamak niryra ara, kanye moubuka kum tenelirye, fia teniltona uk ulule.

Bona weik talin nang ap, bona talina kum nang ap, ati, nyabuk yupu

⁹Bona talina kum nang, talye kan-kan nang ara, sik kan-kan danerye diba tenelamak nang ara, Allah arye akunum lyebuka ereibuka ati, Allah e kanye ara, 'Aninye ara, sik mambul ninye,' tenelule. Ati ara, sik kanye deibuka unamake. ¹⁰Weik mambul nang, sik bona weik talin ninye ara, sik kan-kan arye diba teneamika deice arye, amutam kipnin banamake. Bukni, akunum diba tenenyaka ati, sik talima ap, sambala dib kanye ap ara, fia unamle anya arye, sik babye kanye deibuka uk unamake. Ara kapye yo kita popmalya ani, like tonok arye kum ulamle touk, sik nong ap, sik talibuka unyak ning ap, kum upnamle ati nyapsine. ¹¹Kiting deiplirye, bupu weik uplyop ura, akapye yo kita, sisal seplirye lulsaklamle. Lupsakliirye, kita saklyop ura, el urasin teleb ulamle ning ara, kum ulule. Aning kum ulamle touk, sisin nang babye, sik fil dolamaka noutam arye, sik nong kum upnamle.

**Ikin ning upsiliba winildesulul ning ap, malye ning patapsilye
ura, kanye 'Se,' tenelamsil ning ap ati, nyabuk yupu**

¹²Kanye imun ning upliirye, winilelye talak kum batakaliirye fia palibuka fil dolamlenye bira, kanye deibuka telebuk unamle. Ara

winildena talak noutam nirya arye, ikin ning weik ulamlye bukni, elda fia darapdongobuka ulamlyop ura, el dekna ning doproprnamle atia. Amenenga ning doproprnamle ara, Allah arye, “Na ti kanye deipnice nang ara, winibuka aripnamsine,” nyapdeibuk touk, fia kam una deiyok ning doproprnamle.

¹³Yata nang do nirya, sik kanye malye tenena deice arye, ‘Aning winiptinye se’ tenen, patasilyeba, kanye talima lilosulul talak ara, “E, ara Allah arye, ‘Malye upnul do?’ tenen, na kanye talima lilonulirye, winilenmanile,” kum nyanamlulume. Ayupu kum nyanamlulume deiyok ara, Allah elda malye un ning nirya ara, kum patalula anya arye, malye ning deice arye, el kanye kum lilopdetue. Malye ning arye el ti, kum winipdetue. Tonda, Allah arye ninye nirya ati, ‘Malye uptinge’ tenen, malye ning deice arye, sik talima kum lilosululce, ‘Se amalye ning doptinge,’ kum tenelule, tonda kum asilesulule.

¹⁴Allah arye nun ti, ‘Malye wininamak’ tenen, nun kanye kum lilosulule. Kum winildesulul bukni, ninye nirya ara, sik bidamnye aryuk, ‘Na yuk malye upnun’ tenen, kanye malye tenena deice arye patapliba, kanye lilosululce, ‘Se,’ tenenyakce, malye wininyake. ¹⁵Fia patapliba tenena uk uplyop ura, aminyan ara malye ning laka nong ulule. Malye un ning nong akunum kiplirye neplyop ura, dafia malye upra balamice ani, aminyan sirya talak ara, Allah arye uku din mutuku dopkwetepnamle. Dopkweteplye ura, uku fia dinamle.

¹⁶Ura, na kayapu, na du weit atonun ululum nang ati, na kanye delisunune. Ayupu ton nyapnusine. Anggun bidamnye aryuk, tilila ning kum tenelamlulume. Tonda, tilila ning kum nyalanamlulume. ¹⁷Yata teleb ning do nirya, fia teleb diksukum winina ning nirya ara, Allah elcuk aripsilye ura, im deice arye yangasulule. Ara, im deice dirina ulul ning nirya kwepdeibuknye, Allah elcuk fia teleb ning arisulule. Tonda, Allah elda, kiting deiplirye kanya urasin yuk-yuk kinim-kinim alamle touk, fia kum ulule. Allah el fil dobuka ulul ning nirya ara, fia tuba teleb uk ulule.

¹⁸Allah el kanye tenena deice aniryuk, dopropsukce, el dipkoprop yupu deice arye, el mapu kipdeipsuke. El dipkoprop yupu deice arye, el mapu kipdeipsuka ara, aning-aning nirya kwepdeibuk noutam arye, uteneamuk. ‘Na mapu koprop kipdeipse nang ara, sikda minopce nang atonun, weik mambul unamake. Aning-aning nirya ara, winiryuk ning kintinibuka deipnamne bukni, na mapu ara minopce atonun unamake,’ teneamsuke. Uteneamsukce, nun dobuka el mapu kipdeipsuke.

Teleb winina ap, amul arye yupu kekena ati, nyabuk yupu

¹⁹Na kayapu, nun du weit atonun ululum ninye, anggun nirya ati, na bico tenesunune. Anyapnusin yupu ara, moubuka kekeplulume. Ninye

nirya ara, ninye arye yupu nyabikbuk, ‘Adip aryuk kekenamap’ tenen, kanye kintinilamlulume. Bukni, yuk nang arye yupu nyanmace bukni, ‘Sik yupu yaniptapnirye, minopce na yupu uk nyapnune,’ tenena kume. Yupu nyapnumunye talak nirya ara, minopce moubuka tenepmunce, yupu moubuka nimalye aryuk nyanamlulume. Tonda, minopce yu fia una meme. ²⁰Ara, Allah arye, ‘Diksukumuk unamake,’ tenelul ning ara, ninye yu una deice arye, teleb kibuka kum uptuma ati nyapsine.

²¹Aning ati ara, anggun kanye malye tenelulum ning nirya ap, anggun kan-kan malye un ning weik aupmalye ning nirya ap, batakanamlulume. Batakmunce, Allah arye, ‘Na yupu sik talima noutam duk moupnamle’ tenen, aripsuk ning ara, kanye talima dukdongopmunce, nimalye umunyak arye, kekebuka dolonamlume. Allah el yupu aripsuk ning ara, lyepnamsila atia.

²²Allah yupu nyapsicebuk, anggun amul deice uk kekeplopmunce, ‘Akunuma,’ kum tenenamlulume. Ara, talye amul deice uk kekeplopmunye ura, sik bidamnye aryuk, tilila yupu tenelalamak nang atonun ululuma ati, “Aning ara winina meme,” nyapsine. Allah el yupu deice nyasilye touk, moubuka kekepmunce, dobolbanlulume. Anyak winina kum ura, tilila yupu nyan nang atonun unamlulume.

²³⁻²⁴Yata nang do nirya, Allah yupu amul deice aniryuk kekenyak bukni, kum dobolbanyak nang ara, sik winilamak ning atonun ning ara, nyapnusine. Ara, tonoknye birye kimilana dobuka, el bidamnye urasin dipdalirye, el urasin elilalul bukni, kimilana deibuka yukak bilyop ura, adip aryuk el urasin eipmalye ning ara, luba kilule. Aning atonun, Allah yupu nyakiba, amol deice uk kekenyak nang ara, ‘Allah arye nyapnile, aning ton winibuka nyapnile’ tenen, moubuka kum tenenyakce, luba kildongona uk unyaka ati nyapne.

²⁵Bukni, yata nang do nirya, Allah arye, ‘Wininamak’ tenen, diksukum aryamsuk yupu ara, moubuka fia kel kibikirye, luba kina kum arye, fia dobolbalamice nang ara, sik kanye deibuka unyak ning nirya ara, telebuk unamake. Allah arye diksukum yupu aryamsuk ning ara, malye ning arye kouamsuk noutam arye lobuka delisulule.

²⁶Yatanye do nirya, elce el bidamnye ati, “Na diba tenepsa ati, diksukumnye unune,” talye nyaltakalul bukni, el nyalye yupu moubuka tenena kum arye, talye luba kibuka nyaplyop ura, anye bira tilila yupu uk nyalalule. Atonye bira, el dib tenebuka talibuka ulul ning ara, deiyok kum ubuka ati, nong kum upnamle. Diba tenebuk ning ara, talye uk ulule. ²⁷Nun Ni Allah el kanye ara, ‘Diksukum diba tenena ning, talibuka una ning ara, malye ning nirya tabakuka, una kum ulul ning atia. Winibuka diba tenenyak nang arye, sik teleb unyak ning ara ani. Ara, sikce kwaknamne mapu ap, youwak kilapu ap ati, bico tenebuka melinyake’ tenelule. Tonda, anang ara diba tenena kum ninye arye,

talibuka ulamice malye ning atonun ning, fia talibuka kum unyake. Diksukumuk unyake.

“Ninye urasin dipdebuka, kanye bokolina meme,” nyabuk yupu

2 ¹Na kayapu, nun du weit atonun kipdeipsuk ninyeo, Allah elda weik mambulnye ulirye, fia teleb-telebuk ulye touk, nun deiyoknye Yesus Kristus babye atonun ulule. Anggunce Yesus ati, akunum dib teneluluma anya arye, ninye urasin eipmunce, kanye kum bokoltonamlulume.

²Winipmanto ning nyapnusine. Ura, anggunce, ‘Allah yupu kekepnuyap’ tenen, Allah yupu aik^a akunum wekelyatum talak ara, tonok sisinanye, bona weik talinanye birye dekna weik ning, emas taruk duk dongolul ning ap, fia teleb ongon butum aling ap ongobuka, wekelyatu bukni, atalak aryuk fia talye kankanye ton, pun deibuka kwiliksakamtu butum aling ongobuka wektop ura, anggunce yatato yupu nyaptum do?

³Sisinanye bona weik talinanye fia teleb butum aling ongolul weiknye ati, ‘Se elda mambul,’ tenebuka, nimalye arye, “Telebe amio, teleb ak dabulyalyame,” nyaptum bukni, fia talye kankanye ati ara, “Or karen ak uk tikilbinulyame, akumop ura, nun yan yanilamap amsuna deice uk buklyame,” nyaptumop ura, aning ara, fia malye winilulume, nyapsine.

⁴Ato yupu dipkoprop nyaptuma deice arye, anggun kan-kan noutam arye, ton nang ati ara, ‘Telebe,’ ton nang ati ara, ‘Malye,’ tenebuka, akunum kanye bokolilalulume. Tonda, ato yupu nyaptuma deice arye, yupu bokolin nang atonun bukni, malye ning tenebuka, malye nang atonun akunum ubnalume. Ati winina ara, fia meme nyapsine.

⁵Ura, na kayapu, na nyapnusin yupu moubuka kekeplulume. Aning kum tenipmalum do? Sik diba tenena kum arye, talye tukwak ninye nirya arye, ‘E, anang ara, fia talye kankan ninye anya arye, sikda mambul fia kume,’ tenelamsikce nang ara, Allah arye akankan unyak ninye ara, kunum wipbuke. Allah arye wipsuka ara, ‘Dib tenena deiyok ning ara weik arye aripnamne’ tenen, anang wibuk. Deiyok ara, anang ara na Allah ati, ‘Weik arye diba tenenamniyake,’ tenepsuke.

Ura, yata winin ning do nirya, Allah elda ikin kum uptue. ‘Aning-aning nirya kanam aniryuk ulule’ tenen, Weika arye diba tenenyaba anya arye, bona weik kum talinyab bukni, bona weik talinan nye atonun akunum kipdeipsuke.

Tonda, Allah arye, ‘Na ti, kanye deibuka ulamice nang ara, na im deice talibuka unye ning ara, sirya talak arepnamsine,’ nyapdeiamsuk

^a 2:2 *Allah yupu peterena ap, kekena ap ati domik aik* – Yahudi yala nang, sik Allah yupu petera aik ara, nun mitik gereja atonun wamuk bukni, mitikto yuk. Ara, sikce hari Sabtu weklamikce, Allah el si erelamik. Tonda yuk-yuk sum ara, Allah yupu kekena ap, peterena ap, ninye wapdanop ura sik yupu lipsisikuka bokoliana ati, anyaik weklamik. Bahasa Indonesia deice arye, ‘rumah ibada’ nyanyake. Anyaik lak len yupu ati, nomor 26 dipdelulume.

touk, aripsilibuk dolonamabe. Ati, talye kankan ninye wipsuka ara, kum tenipmalum do? ⁶Kankan ninye wibuk bukni, anggunce, ‘Kankan ninye mambul kume,’ tenepmatum deice arye, anang sik nong deice malye yupu nyaplulume.

Ton tenipdelulume. Sik bona weik talin ninye arye, anggung nong deice ikin ning deipsikirye, anggung ning dobuka malye ulisinyak ara, kum tenipmalum do? Tonda, sik sisin ninye bona weik talin ninye arye, ‘Anggun talipdongobuka, sik ning dalubuka dopronnamap’ tenen, yupu bokolina deiyok nang dam bobasinyak ara kum tenipmalum do? ⁷Tonda, sik sisin nang bona weik talin ninye arye, nun lyebuka talisululnye, el si fia telebnye Yesus ati, malye yupu nyabuka, lululinyaka ara, kum tenipmalum do? Aning ati ara, ninye urasin dipdebuka kanye bokolina kume, nyapsine.

⁸Allah arye, ‘Wininamake’ tenen, el yupu deice arye weik mambule nyapsuk ning ara, ani.

‘Ara, anggunce anggung bidamnye patapsilye ning, ‘Aning mambule’ tenen, melilalamlum touk, anggunce anggung ap neika ululum nang ati, bico tenebuka melinamlume, nyapdeipsuke.’ (*Imamat 19:18*)

Anyapdeipsuk yupu ara moubuka kekepmunce, dobolbalamunye ura, fia telebuk unamlulume. ⁹Bukni, anggunce yuk nang ati, urasin dipdebuka, kanye bokeipmunyop ura, adeice arye malye ululume. Ara Allah arye, ‘Wininamlulume, aning ara kum wininamlulume,’ nyapsuk yupu mem yupu deice arye, “Winina meme,” nyapdeipsuka ati, ayupu yaniptapmunyop ura, ara Allah arye nyapdeiamuk yupu yaniltan nang ululume.

¹⁰Ayupu nyapmasina ara, talye ati kume. Yata nang do nirya, Allah arye nyapdeiamuk yupu nirya dobolbanyak bukni, tonok ning ton yanibicop ura, ara ayupu nirya yaniltana atonun unyake. ¹¹Anyapmasin yupu deiyok ara, ani. Ara, “Anggun kil kopropa batakuka, yuk kil dobuka talye yolana meme,” nyabuknye, elcuk ayupu ton, “Ninye talye oltakana meme,” nyabuk. Ayupu nyabuka deiyoknye bira tonok ulula anya arye, anggung kil batakuka, yuk kil kum yolulum bukni, ninye opmunyop ura, ara el nyabuk yupu nirya yaniltana atonun ululume. Anyapmasin yupu deiyok ara, ayupu nirya nyabuka deiyoknye bira, el tonok ati nyapsine.

¹²Allah el yupu ara, malye ning arye koupsukba, ulamupa noutam arye lobuka deipsuke. Tonda, tuba-tuba loltakasulule. Sirya talak ara, Allah er yupu deice arye nun unyap ning nirya ati, yupu bokeipnamsile. Ati, anggung nyanamlum yupu nirya ap, anggung wininamlulum ning nirya ap noutam arye, aning uk tenebuka, diksukumuk unamlulume.

¹³Aning uk tenebuka wininamluluma deiyok ara, ani. Ara, yata nang do nirya, yuk nang arye sik ti malye ubice ura, bico tenebuka luba kina kum arye, malye ubuka wenebmace nang ara, Allah arye anang sik

malye winin ning ati, talye luba kinamle do? Kume, Allah arye awenebice nang ati, sikce yuk nang ati wenena yupu nyalamak touk, bico tenebuka luba kina kum arye, tamubuka weik arye wenebuka opnamle. Bukni, yuk nang arye, sik malye upsikiba, bico tenebuka lubkinyak nang ati ara, Allah el babye anang ati, bico tenebuka, lupakilongonamle anya arye, weik arye kum wenepnamle.

Dib tenebibirye, Allah yupu dipkoprop melibuka bana ati nyabuk yupu

¹⁴Na kayapu, nun du weit atonun kipdeipsuk ninyeo, yata nang do nirya, sik talye yupu deice arye, “Na akunum diba tenepse,” nyaplopting bukni, sik diksukum winin ning kum uplyop ura, ara talye nyanyaka anya arye, sik diba tenenyak ning ara, nong kum upnamle. Ato yupu, talye nyaltakalamtu yupu deice arye, Allah arye atonye ati lyeptu do? Kume. Fia dipkoprop diba kum tenelula ati, Allah arye atonye kum lyepnamle.

¹⁵⁻¹⁶Anyapmasin yupu ara, winipmanto yupu ton nyapnusine. Ura, tonoknye do, tonok kil do, sik asum-asum nirya din ning ap, ongon aling ap pataplye ning kum wabtuop ura, anggun kan-kan tonoknye birye anang ati, “Amio, telebe, bupu ongon aling ongobuka, teleb dinuk dibuka unamlulume,” nyabuka, talye uk nyaplopturye, dipkoprop anye pataptu ning ati, kum meliptuop ura, talye yupu deice arye meliptu do? Awinina ning ara, teleb do? Kume. ¹⁷Anyapmasin ning atonun, sik diba tenen ning aupmatu bukni, dipkoprop diksukum winin ning ton kum uplyop ura, talye uk ulule. Nong kum upnamle. Ara dibina atonun ulule.

¹⁸Bukni, tonoknye birye, na ti nyapnutue. “Kume, tonye bira, diba tenen ninguk upmale. Yuknye bira, diksukum winin ninguk upmale,” nyapnutue. Bukni, na arye tamubuka nyapsine. Anggunce, anggun winin ning laka nyana kum arye, “Na diba tenepse ning ani, ani,” nyabuka, talye yupu deice arye, laka peterepnutum bukni, lakak nong kum kel kipsitinye. Na op ura, anggun ti, na diksukum wininun ning laka nyapsitinyop ura, na winin ning deice arye, diba tenepse ning ara, nong lakak uplibuk, aning deice arye kel kipnamlume. ¹⁹Anggunda, ‘Allah el tonokuk ulule’ tenen, diba tenelulume. Adiba tenelulum ning ara, teleb bukni, isa mer nirya, sik babye anggun tenelulum atonun tenebikirye, Allah ati ilil ubikirye sirimtalilule.

²⁰Se, anggun walwal arye, kanye bona kum nang atonun ululume. Na arye, diba tenen ning aupmatu bukni, dipkoprop diksukum winin ning ton kum uplyop ura, dipna atonun ulule nyapmasine. Anyapmasin yupu ara, ‘Deiyok aubtubuk kekeptibye’ tenen, patapmasilbuk, diba kum tenepmanulum do? Ati ara, deiyok ning tonok ubuk ning ton, laka nyapnusine.

²¹Aning ton kum tenipmalum do? Nun apu kopropa Abraham arye el mi tonok ulamuk bukni, Isak dobuka keil pala yangabuka deipmokak

deibukce, ‘Allah arina ati opnun’ tenen, kintinibuka deice arye, Allah arye utenebuk. Allah arye, ‘Abraham afil na ti dopnila deice arye, na kanye ara, Abraham elda dipkoprop diksukumnye ulule,’ tenebuk.

²² Allah arye utenebuka ati, anggun ton teniplulume. Abraham afil dobuka deice arye, elce Allah ati diba teneamuknye lakak ubuka ati, kel kiptume. Abraham el diba tenebuk ning ap, el fil dipkoprop dobuk ning ap ara, neika atonun ubuk. Atouk winibuka ati, el diba tenebuk ning ara, afil dobuka deice arye, teleb ubuka fia wisibuke. ²³ Abraham arye awinibuk ning ara, Allah arye nyalilamuk touk winibuk. Allah nyalilamuk yupu ara ani.

‘Abraham arye Allah ati dipkoprop tenebuka deice arye, Allah el kanye ara, ‘Abraham ara fia diksukumnye ulule,’ tenebukce, teleb kipdeipbuk.’ *(Kejadian 15:6)*

Tonda, yuk nang arye, Abraham ati nyabik, ‘Abraham elda, Allah el ka kopropa ulule,’ nyanyake. ²⁴ Aning ati ara, akunum lakak uple. Allah arye ninye nirya ati, ‘Anang ara diksukum nang,’ tenepsilirye, ayupu nyalisilya ara, ‘Nun talye diba tenepmabe,’ nyaltakabya deice arye kume. Nun diba tenena ap, diksukum una ap, diksukum winina ap unyaba deice, Allah arye, ‘Anang ara teleb nang, diksukum winin nang unyake,’ tenepsilirye, ayupu nyalisululce, teleb kipdeipsilirye.

²⁵ Aning atonun, Rahab ara, talye-talye yolamik kil, malye kil ulamuk bukni, el teleb fil dobuka deice arye, Allah arye, ‘Akil ara teleb kil ulule,’ tenebukce, ayupu nyapdeipbukce, akil ati teleb kipdeibuk. Rahab arye fil dobuka ara, ani. Ara, Rahab ara, Israel yala kil kum bukni, Israel nang arye, ‘Amutuku unyak kili sal obuka bisipnamap’ tenen, dilyarikbuk, akil arye anang dobuka, el aik noutam duknubuka deibuk ura, mabrik. Mapmarika berekukop ura, amutuku nang arye, ‘Israel nang bitinye opnuyap’ tenen, dilyanganmek bisik batakuka, yuk bisik dopkwetebuk ura, birik. Afil dobuka deice, Allah arye, akil ati, “Akil ara akunum teleb kipdeipne,” nyabuke.

²⁶ Ati, ayupu ton nyapsine. Ninye nong dipmace talak, ninye kanye akunum bilyop ura, ninye nong dibina uk unyake. Atouk, anggun diba teneptum bukni, anggun diksukum winin ning ton kum ulyop ura, anggun diba tenena ning babye, dipna atonun ulule.

“Ninye sitang arye malye nyanyake,” nyabuk yupu

3 ¹ Na kayapu, nun du weit atonun kipdeipsuk ninyeo. Ninye nyanyak yupu deice arye, malye ning yala-yala weik weleplirye, malye ulisulula anya arye, ayupu ton nyapnusine. Anggunce, ‘Nun kan-kan arye nun peterena deiyok nang weik unamabe,’ tenena bataknamlulume. Aning ara, deiyok nyapnusine. Anggun kele. Allah arye talye nang ati, yupu bokeipnamle atonun kum bukni, nun peterena deiyok nang ati

ara, tonok ning babye lubakina kum arye, nun wininyap ning nirya lelebuka asipdesiliry, winipdesilye ura, yupu mikip arye bokeipnamsil ati nyapsine. ²Nun nirya arye, ‘Na malye kum upnun do?’ tenen, winilebyebuk, mankau arye aning-aning yala yuk-yuk malye unyabe. Tonoknye birye, el nyalye yupu noutam nirya ara, tonok malye ning babye kum nyaplyop ura, anye bira dipkoprop diksukumnye ulule. Anye bira, el nyalye yupu nirya moubuka tenepliry, teleb ninguk nyalul touk, el nong ap, el winin ning nirya ap ati, ‘Malye upnyak’ tenen, moubuka kalikilalule.

³Ara, winipmanto yupu nyapnusine. Kuda^b basam ara, mikip weik ning ulul bukni, ‘Nun tenebible touk winipnusil’ tenen, kat ning el si arikdongobibirye, dana-dana tam tapu kirikmapyop ura, nunce lilobibibuk, nun tenepmabye bisik uk balule. ⁴Ton ning ara ani. Laut mekwen deice balamak weik mek liya yo ton tenipdelulume. Nong weik mek liya yo^c ara, ikin weik ning ulul bukni, kumanya mikip aryuk doplibuk, mekwen deice balamak. Balamak bukni, gabung yo der tam mek bukna yo mitik ninguk bukni, fum potokuka ayo kintinibuka deiamica arye, mek liya yo deiyoknye birye bukulye ura, abisik uk balamake.

⁵Ayupu nyapmasin touk, nun ninye sitang ara, nun nong noutam mitik ninguk upsuk bukni, asitang arye kwalin yupu weik nyabica deice arye, malye ning weik usulule. Ton tenipdelulume. Weik yo kan-kan pamtu ak babye, dou mapturye, kel-kel abuka sesal leptu ura, tonok tong uku arye diniptingbuk, nirya uku diptue. ⁶Aning atonun, malye yupu nyanyaba deice arye, uku buk dilamle atonun usulule. Nun nong noutamak ara, nun sitang deice arye malye un ning yala-yala weik welepsiliry, nun nong ap, nun winin ning nirya ap, malye ulisulule. Winira, yo noutam wekliry, uku buk weik arye dilamle touk, nun sitang deice arye, nun winin ning nirya malye ulisulule. Sirya talak ara, amalye yupu nyanyak ninye ap, sik sitang ap ara, uku din mutuku uku arye fia dinamle.

⁷Aning-aning kam ulul ning nirya ara, maka yala nirya ap, kwatima ap, laut mekwen fumbisik ulul ning nirya ap, ninye arye am talyamik touk, tuba tanyake. ⁸Aning-aning nirya ninye arye tanyak bukni, yata nang do nirya, sitang ara kum am taptinge. Sitang ara fia weik malye ning ati, fia parap-parap alula anya arye, kum batakmanto. Ninye dipna ati, ninye on kwatima, yu weik kwatima arye si toamsilyebuk, uk dibuka

^b 3:3 *Kuda ara*, sapi basam nong mitikto atonun ulul ning bukni, el yan ara jang weik. Tonda, sapi basam kisok deice tiklamle atonun fia kume. Sapi banye deice ara, ninye kum bukuka banyake. Bukni kuda ara, el balye deice bukikirye banyake. ^c 3:4 *Mek liya yo* arye mekwen deice bana ati, lak len yupu nomor 33 dipdelulume. Tonda, Matias 8:27 dipdelelume.

dibilamak touk, nun sitang deice, fia malye yupu nyabibya deice arye, ninye malye ubice ura, dibinyake.

⁹Nun si bam bol ap, sitang ap ara tonok bukni, ton talak ara asitang aryuk bukni, nun Ni Allah ati si erenyabe. Ton talak ara, el atonun kwepdeibuk ninye bukni, nunda asitang aryuk sik nong deice malye yupu nyan nyabe. ¹⁰Nun si bam bol tonok bukni, adeice aryuk Allah si erena yupu ap, ninye malye len yupu ap nyanyabe. Se, na kayapu dipkoprop aning ara, fia kum winiptibye. Ara fia malye atia.

¹¹Tenipdelulume, teleb ulamle mek ap, sisilya mek ap, tonok mek pu dolona arye yangalul do? ¹²Aning atonun na weit yapu tenipdelulume. Tonok yala yo duk moulamle yo arye, yuk yala yo duk mouptu do? Tonda tonok duk moulamle tapu arye, yuk yala tapu duk mouptu do? Kume, kwarang yo arye, kabalye yo duk kum mouptue. Aning kum winipmanto. Aning atonun, teleb ulamle mek ap, sisilya mek ap, tonok mek pu dona arye kum yatue. Aning atonun, nun si bam bol tonok aniryuk, Allah si eren yupu ap, yuk ninye ati malye len yupu ap, talye tabakuka kum nyanamabe. Aning ara, fia malye.

Weik kel kina deiyok ning ati, nyabuk yupu

¹³Anggun kan-kan noutam arye yata nang do, pung teleb un bisik kel nang ap, aning-aning nirya weik kel nang ap unyak do? Sik awiningop ura, sik teleb winin ning nirya deice arye lakak nyanamsiake. Tonda, Allah arye weik kel bikna deiyok ning, sik ti aribuk deice arye, talima mitang ubuka teleb winin fil dolamaka deice arye, lakak nyanamsiake. ¹⁴Bukni, anggun kanye talima noutamak ara, yuk nang ning asing eipmunce, 'Aning na uk doproptinye' tenen, patana ap, ura, 'Na uk erepnitinge' tenen, patana ap awinipsilyop ura, aning ati kanye deibuka, kwalina ap, makna kintinilina ap kum danamlulume. Tonda, aning awabsilyop ura, kum dungnunamlulume.

¹⁵Winin ning ara, nun Ni Allah im deice arye kum arisulule. Ara Allah arye, 'Wininamake,' tenesilye touk winin ning kume. Ara nun babye kanye talima noutam patapsilye ning uka. Amalye usilye ning ara, sik diba tenena kum ninye ara, Allah El Dib Kanye nyasilye yupu kum kekenyakce, yaniltana uk wininyak ning ati nyapsine. Tonda aning ara, Isa Mutuku Dongonye arye nyalibuk, malye ubibyop ura, malye ulisulule. ¹⁶Anyapmasina ara talye ati kume. 'Yuk nang ning na uk doproptinye,' tenena ap, 'Na uk erepnitinge,' tenena ap, awinipsilye mutuku nirya ara, malye ubuka, kwalina arye talye-talye una ap, fia malye tenebuka, malye un ning yuk-yuk nirya ap aunamle.

¹⁷Amalye un ning akunum nyapmasin bukni, Allah arye weik kel bikilina deiyok ning arisulula ara, winira nyapnusine. Minop ara, el kel bikilina deiyok arisilye ning ara, yuk malye ning tonok babye tabakuka

kum ulule, diksukumuk ulule. Ton anang ara, ‘Nun nirya talima nimalye aryuk, telebuk neika ulamtibye’ tenen, patalule. Tonda, sikce, ‘Na yupu nyapnikcop ura, yuk nang kekebikirye, alye una ap, ilil una ap, kanye ikine ap, kanye delina ap, unamak do, kum do?’ tenen, minopce moubuka teniltonyake.

Tonda, ninye arye yupu nyabikibuk, moubuka kekebikirye, nimalye aryuk unyake. Tonda, yuk nang malye ubicop ura, ‘Na adip aryuk wenebuka optinye,’ kum tenebikirye, anang ati, bico tenebuka luba kilongonyake. Sik yupu nirya ara, duknuna kum arye, lakak uk laka nyanyake. Ton ninye urasin eibikirye, sik kanye kum bokolinyake. Sik teleb ubuka diksukum unyak ning noutam nirya ara, duk telebuk moulule.

¹⁸Anang ara, ‘Nun nirya talima lamapdongobuka, walana ap, oldana ap kum arye, telebuk neika unamabe’ tenen, winibuka winilamice ani, sik teleb winin ning deice arye duk moupnamle ara, diksukum un ning atia.

“Dib tenena kum nang arye, sik wininyak ning talibuka winina meme,” nyabuk yupu

4 ¹Anggun yu upsiliba, walana ap, yupu deice malye yupu nyaldana ap ululuma ara, yata ning deiyok arye usulul do? Kume, teleb ning ap, malye ning ap, anggun talima noutam patatapsilye ura, teneluluma deice arye, anggun talima noutam anyak olalulume. ²‘Aning doproptinye’ tenen, fia patasilye bukni, kum dololulume. ‘Yuk nang talinyak ning dalubuka doproptibye’ tenen, ton talak arye fia patapsiliba, teniltona uk ululume. Ton talak ara, anang ara oltakana uk ululume. Winilulum bukni, anggun patatapsilye ura, tenelulum ning ara, kum usulule. Tonda, anggun patatapsilye ning ara, kum dopmanto ululume. Anggun patatapsilye ning ara, ‘Allah elce arilnamsil’ tenen, Allah ati kum morolulume anya arye, kum dololulume. Walana ap, yupu deice malye yupu nyaldana anyuk winilulume.

³Ton talak ara, Allah ati morolulum bukni, anggun talima noutam malye ning patatapsilye ura, atenen deice arye morolulume ati, Allah arye aning kum arisulule. Kum arisilya deiyok ara ani. Ara, ‘Aning doproptibirye, nun patasilye ninguk talibuka unamabe’ tenen, patapsilibuk teneluluma deice arye morolulume ati, Allah arye kum arisulule.

⁴Anggunda, Allah el tonok kanye deibuka dobolbalamtum bukni, yuk ning patatapsilye ura, kanye delilulama anya arye, sik donyak kil batakuka, yuk kil dololamak nang atonun winilulume. Ara, Allah ti batakuka, yuk ninguk teneluluma atia. Anggunce aning kum tenipmalum do? Talya tukwak ubuk ning ap, diba tenena kum nang arye, Allah El Dib Kanye

nyasulul yupu yaniltakirye, malye unyak ning ap, malye ning patapsilye ning ap ara, ‘Allah lik,’ tenebuka winina atonun nyapsine. Yata nang do nirya, ‘Talye tukwak ubuk ning nirya, anyuk talibuka unamne,’ tenebuka ulamice nang ara, atenenyak deice arye, ‘Allah na like,’ tenebuka akunum unyake. Ara tukwak malye ning ap, diba tenena kum ninye arye, malye unyak ning ap, Allah ap neika talibuka kum upmanto atia.

⁵Allah el yupu deice arye nyasulule. “Allah arye aripsukbuk nun talima ak Dib Kanye usilya arye, ‘Anang ara na’ tenen, tenepsilirye, ‘Yuk ning pataplibuk na bataknicak’ tenen, fia kalikisulule.” Ayupu nyapsuka ara, talye yupu uk nyapsuka tenelulum do? Kume, Allah El Dib Kanye arye, ‘Yuk malye ning talibuka bicak’ tenen, fia kalikisulul ati, Allah arye, ‘Sik malye ubicak’ tenen, el mikip arisilya deice arye, fia tuba-tuba talibuka melisulule. ⁶Aning ati ara, Allah yupu deice ayupu nyapsine.

‘Allah arye sik talima kanye erena nang ati, yaniltalule. Bukni, sik kanye talima darabuka amuak unyak nang ati, el mikip arilula deice arye, talibuka melilule.’

(Amsal 3:34)

Talima nimalye arye ubuka, Allah el amuak una ati, nyabuk yupu

⁷Aning ati ara, anggun kanye talima nimalye arye ubuka, Allah el amuak umunce, el yupu uk kekenamlulume. Isa Mutuku Dongonye ati ara, el yupu kekebuka dobolbana kum arye, manya deibuka tunimapmunyop ura, Isa Mutuku Dongonye anggun dam arye, sakdakuka yukak binamle. ⁸Allah el tam kipedopmunyop ura, Allah elce anggun dam unamle. Sik malye ning paliplibuk, taruk mek liklamak touk, anggun malye winimunye nang ara, anggun malye ning batakanamlulume. Anggun kanye bitinye kisululbuk, kanye bokoltosulul nang ara, anggun kanye talima noutam malye upsilye ning nirya batakanamlulume. Allah arye nyasilye yupu kekebuka wininamlulume. ‘Tonok kanye bobuka unamlum’ tenen, nyapsine.

⁹Anggun malye winimunye ning ati, kanye imun kanye bobuka, talima sukupsilirye, malye nyabuka engenamlume. Anggun malye winilamlum ning ap, talye-talye ulamlum ning ap, tenebuka tenepra bamunce, akutunamlulum ning ara, amalye ning pununa ati, talima sukupsilirye, fia engenamlume.

Tonda, malye winilalumce kanye deibuka winimunye ning ara, amalye ning pununa ati, yokdaksilibuk kanye fia teniltona uk ulamunce, kanye sukuna uk unamlulume. ¹⁰Anggun kanye talima nimalye arye ubuka, Allah el amuak kipedopmunyop ura, Allah arye anggun ti erepdeipnamsile.

“Yuk nang ati, minina yupu nyana meme,” nyabuk yupu

¹¹Na kayapu nang, nun dib tenen nang unyaba anya arye, anggunce anggun kayapu nang ati, minina yupu kum nyalanamlulume. Anggun

diba teneplum nang arye, yuk diba tenebik nang ati, malye yupu ap, minina yupu ap nyapmunce, sik nong deice deipmunyop ura, ara Allah arye, ‘Wininamlulume, aning ara, kum wininamlulume,’ tenen, nyapsuk yupu yanina atonun ululume. Ara talye ati kume. Anggun babye diba teneplum nang arye, yuk diba tenenyak nang ati, “Anggunda malye nang ululume,” nyabuka, malye yupu nyalalulumop ura, ara anggunda yupu bokolina deiyok nang atonun ululume. Aning ara, fia malye winilulume.

Allah el yupu deice arye, “Malye yupu kum nyalanamlulume,” nyapsuk bukni, aning akunum winipmunyop ura, el yupu akunum yaniplume. Allah arye nyapsuk yupu noutam bukni, ayupu nirya dobolbana kum arye, ton yupu yaniltana, ton yupu kekena kum umunya deice arye, yupu bokolina deiyok nang atonun akunum umunce, el yupu nirya yaniltalulume. Ati aning ara winina meme nyapsine.

¹² Allah arye, ‘Ninye nirya wininamak, aning ton kum wininamak’ tenen, yupu deiyok aripsuka Deiyoknye bira, Allah el tonok ulule. Tonda, ninye nirya sik winin ning ati, Yupu Bokolina Deiyoknye bira, el tonok ulule. Allah arye ton ninye ara lyelilulce, ton ninye ara wenepirye oltakalule. Winilula deiyoknye bira, Allah el uka. Allah el aniryuk winilul bukni, anggunda yatato weik nang umunce, anggun kanye dukdongobuka neika ululum nang ati, “Anda telebe, anda malye,” nyabuka yupu bokolilalulum do? Aning nirya ara, winina meme nyapsine.

“Kwalibuka una ap, makna kintinilina ap, fia meme,” nyabuk yupu

¹³ Ura, anggunce, ‘Ambusum do, arup do, otam weik karin mutuku bibirye, kiting tamun tonok deice arye fil dolamibya ani, sirya dakeipyop ura, yo bok weik dolonamabe’ tenen, talye luba kibuka nyalulum nang ati, na nyapnusin yupu kekepnululume. ¹⁴ Anggun ayupu nyalulum ning ara yata ati do? Ambusum winipnamasil ning, aning babye tenebuka kum kel keptuma ati, nyana meme. Anggun kam unamlulum talak nirya atonun ning nyapnusine. Dua puto welebli ani, kiting deiplirye, kiting bupu arye minopce kum danalamle touk ululume.

¹⁵ Ati ara, “Wininamabe, wininamabe,” nyaluluma atonun kum bukni, teleb yupu nyaptum ning ara, nyapnusine. Nyanamluma ara, “Allah arye, ‘Wininamake, wininamake,’ tenepsutuop ura, el arye milipsitu deice aniryuk winilamibya ani, afil ton, afil ton donamape,” nyaptume. ¹⁶ Winibuka nyaptum bukni, winitalak, ‘Wininamabe’ tenen, talye luba kibuka nyalulum ning ara, kwalina nang yupu nyalamak touk nyalulume. Ayupu atonun kwalina yupu nyana ara, fia malye. Ati ara aning winina meme. ¹⁷ Ati, yata nang do nirya, ‘Teleb un ning ani,’ tenebuka, akunum kel kinyak bukni, ‘Aning dauplye’ tenen, tunimabuka lubakinauk ubicop ura, ara malye akunum wininyake.

**Sisin ninye bona weik talinyak nang, dib tenena
kum unyaka ati wenebuk yupu**

5 ¹Ura, anggun diba tenena kum arye, sisin ninye bona weik talilulum ninye ululum nang ara, na nyapnusin yupu ara moubuka kekeplulume. Anggun fia ikin ning, aminyan talak upnamsil ning ati, kanye imun kanye bopmunce, malye nyabuka weik arye engenamlume. ²Aning-aning nirya dekna weik arye dekuka, ‘Na’ tenen, delilalum ning ara, akunum lyubuke. Anggun fia teleb ongon aling ara singe ap, kiririmu ap arye akunum dipropsuke. Anggun kat ning, dekna weik ning, emas ap, perak ap ara, ‘Na,’ tenen deiamlum bukni, sisilya burubuk ura, akunum malye ubuke. ³Anggun dekna weik ning sisilya ubuka deice arye, “Anang ara malye nang,” nyabuka, sisekipnamsile.

Tonda, uku buk arye ngelum-ngelum abuka dilamle touk, asisilya atonun ubuk ning arye, anggun nong fia uk dinauk unamsile. Winira sirya daknamle talak noutam arye akunum unyabe. Awinipsilye talak noutam arye, anggunce, ‘Aning nirya, na uk talipnamne. Aning ara, na ning’ tenen, moubuka deililalum ning ara, fia malye ululume.

⁴Anggun moubuka tenepnululume. Anggunce, “Nun wa wipdeipsululume,” nyalilalum ati, anggun wa wilamsiak bukni, wa wina ati dekna yo bok ara kum arilamlumce, anggun aik uk moubuka deililamluma deice arye, si sekelisulule. Anggun wa wibuka kouamik ning libuka, sirya dakuka yangalamik nang arye, malye nyabuka engelamik yupu ara, Allah nun Weik Deiyoknye damak biyukbuk kekebuke. Allah ara, aning-aning nirya talina deiyoknye ululce, moupbuka disilirya anye arye, anggun ara bicoe. Ikin weik upnamsile.

⁵Anggun tukwak mutuku umunye talak nirya ara, ninye kanye delina fia teleb ning nirya talibuka, mutan nang ululume. Winipmanto ning ara ani. Anggunda, ‘Sapi basam owala obuka dipnamape’ tenen, el dina weik arye arilamice bukni, weik neplirye, bol teleb uplyop ura, asapi basam arye, ‘Na opnamniak,’ kum teneamlye bukni, obuka dilamak atonun ululume. Aning atonun, ‘Nun malye winin ning weik upsilye ura, aminyan talak ara, Allah arye wenebuka opnamsile’ tenen, malye kanye kum boluluma ati, nyapsine. ⁶Tonda, yuk nang arye, sik bona weik talin ninye ati, ‘Sik yupu ara nunce yanibuka bisipnamabe,’ kum tenelamikce, malye un ning kum ulamik bukni, anggun sisin nang arye anang ati, malye yupu nyabuka bokolilamlumce, oltakalulume. Ati, anggunda fia malye ululume nyapsine.

**“Ikin ning upsiliba, teniltona kum arye,
tunimabuka unamlulume,” nyabuk yupu**

⁷Ara, na kayapu. Nun du weit atonun kipdeipsuk ninye ati nyapsine. Nun deiyoknye Yesus tamubuka kum yanmalye talak ara, teniltona kum

arye, teleb kanye bobuka tunimabuka unamlulume. Winipmanto yupu ati nyapnusine. Ara, wa wibuka koulamle deiyoknye birye, ‘Na koupse ning ara teleb ubuka pablyop ura, libnamanca’ tenen, tonda, ‘Dou talye manmalya ani, aminyan ara, mok yanamalca’ tenen, teleb kanye deibuka, talye luba kibuka ulamle touk, anggun babye atonun wininamlulume.

⁸Ara, ‘Yesus talibuka unamne do, bataknarne do?’ tenen, teniltona kum arye, teleb kanye deibuka, ding abuka unamlulume. Ara talye ati kume. Nun deiyoknye Yesus, el yanamle talak dam upmala ati nyapsine.

⁹Tonda, anggunda, anggun kanye dukdongopdalam nang ati, malye yupu kum nyalanamlulume. Malye yupu nyalalulumop ura, aminyan ara, Allah arye yupu bokeipsiliryen wenepnamsile. Winira nun yupu bokeipnamsil Deiyoknye bira, buplan dam akunum tikilyanmalce dinmasile.

¹⁰Na du weit atonun ululum nang ati nyapsine. Allah el si deice arye, el yupu laka nyalamik nang, sik nabi-nabi^d nang arye ulamik ning ara, ila tonap nyapsinibuk, tenipdenamlume. Sik kanye imun kanye bomik talak noutamak ara, kanye teniltona kum arye, tunimabuka winilamik ara, tenipdelulume. Ikin ning weik ulamu bukni, sik kanye deibuka ulamik ara, fia teleb ulamika anya arye, anggun aning uk tenepmunce, sik ulamik atonun wininamlulume.

¹¹Anggun kele, ikin ning weik ulamu bukni, sik batakna kum arye, diba tenelamikce, fia pi dobuka, fil dolamik nang ulamik. Winilamika ati, Allah arye sik ti, teleb ubuka kipdeiamukbuk, kanye deibuka ulamik. Tonda, nunce, ‘Anang ara, weik mambule, sik fia telebuk ulamik,’ tenenyabe. Anggunda ayupu akunum kekelamlume. Ayub ara, el nong deice ikin ning fia weik ulamu bukni, teniltona kum arye, fia palibuka tunimabuka ulamuk. Daulamukba, Allah arye ila tamubuka aribuk ning ara, akunum kekelamlumce kel biklume. Nun ni Allah ara, fia bico tenepsiliryen, nun malye wininyap ning ati optapsitu bukni, lubakipsiliryen, nun patapsilyen ning nirya ati, talye arisulule.

¹²Winira nun du weit atonun unyap nang ati, weik mambul yupu ara nyapnusine. Anggunce, “Wininamabe,” nyalulum talak nirya ara, ‘Yuk nang arye diba tenepnamsiyak’ tenen, mambul ning si ap deice arye nyana kume. Tonda, yupu canga arye nyana meme. Ara, yata ning si do nirya, im deice ulul ning si ap, tukwak ulul ning si ap, tabakuka nyana meme. Tonda, ‘Yuk ninye arye, diba tenepnamniak’ tenen, “Na ara talinye birye nyapmakin do?” nyabuka, yupu weika arye nyalamak touk winina meme. Ati, malye yupu nyapmunyebuk, Allah arye wenepsilyak

^d 5:10 *Nabi-nabi nang: Allah el yupu laka nyan nang* – Allah el yupu laka nyan nang ara, Allah arye, ‘Ninye kekepnamak’ tenen, elce wibuka deiyamak nang ati, el yupu laka nyabukop ura, anang arye, yuk ninye nirya ati, laka nyalalamik. Anang ara, nabi nang nyanyabe. Nabi nang sik laka nyan yupu nomor 25 dipdelulume.

ati, ‘Telebe, aning winipnune,’ tenepmunyop ura, “Teleb, aning winipnune,” nyana uka. Aning atonun, “Kume, aning kum winipnune,” tenepmunyop ura, lak akarye, “Kume aning kum winipnune,” nyana uka. ‘Yuk nang arye, nun nyanyap yupu diba tenepnamsiyak’ tenen, mambul ning si ap tabakuka nyana meme.

“Fia dib tenena deice arye, Allah moronamlume,” nyabuk yupu

¹³ Anggun kan-kan noutam arye, tonoknye ton kanye imun ning uplyop ura, adip aryuk elce Allah moronamle. Tonda, yuknye ton, kanye deiplyop ura, kanye deibuka Allah ati, “Telebe,” nyabuka, Allah si erebuka mot nyanamle. ¹⁴ Anggun kan-kan noutam arye yuknye ton, uk dinmalye ura, Allah yupu aik talin nang, majelis nang ati yukupnamlulume. Yukupmunyebuk yakcop ura, anang arye basam mekwen atonun minyak dobuka, Allah el si deice arye, anye el nong deice likeipbikirye, ‘Allah arye kweteipnul’ tenen, Allah moronamake.

¹⁵ Kanye bokoltona kum arye, Allah fia diba tenebicka deice arye morobikcop ura, Allah arye uk dilamline kweteipnamle. Kweteiplirye, kam bulinamle. Auk dilinye bira, minop arye malye ulamtuop ura, Allah arye anye bira el malye winina ati, namin kiplirye, kum daneipnamle. ¹⁶ Aning ati ara, ‘Allah arye kweteipnamsil’ tenen, anggun malye winimunye ning nirya, lak akarye laka nyabuka nyapdamunce, Allah morolanamlulume. Fia diksukumuk wininyak ninye arye, Allah morolamaka ara, mikip weik ulya deice arye, Allah kekeplirye, teleb kipdeilisulule.

¹⁷ Ura, minop talak ulamuk nabinye Elia ara, nun talye ulamap nang atonun ulamuk bukni, elce, ‘Mok kum cepnamle’ tenen, fia diba tenebukce, fia pi dobuka, Allah morobukop ura, kiting tamun winilye ap, ton kiting tamun noutam ap deice arye, mok fia kum celamuk. Dou uk malamuk. ¹⁸ Winibuka morobuk ura, dou malamukba, nabi Elia arye, ‘Ila tamubuka mok ceptu’ tenen, Allah morobukop ura, tamubuka mok celamuk ani, ninye arye koulamik ning palamuk.

¹⁹ Na kayapu, nun du weit atonun kipdeipsuk nango, yupu ton nyapnusine. Ara yata nang do nirya, Allah el dipkoprop yupu deice nyasilye bisik bindebuka, abisik batakuka, yuk bisik kirikuka bilyop ura, yuk nang arye anye dobuka, teleb bisikak uk, yanuka tamubodeibicop ura, ara fia telebe. Ati, anyapnusin yupu ara, ila tamubuka tonap tenenammlulume.

²⁰ Yata nang do nirya, yuk nang malye bisik bace bukni, teleb bisikuk yanuka tamupdeibice nang ara, fia mambul fil donyake. Ara, amalye bisik banyak nang ara, abisik fia dobolbitingop ura, diptingop ura, uku din mutuku dongoptubuk, afia unamtinge. Bukni, anang arye tamubuka, teleb bisik delilyanamak deice arye melibikikba, Allah arye malye bisik

binamice ninye ati lyelule. Tonda, afil melibuka dolamaka deice arye, Allah arye sik malye winin nang, sik malye ning nirya namin kibuka, teleb ubuka delinamle.

Telebe, asukum uk sekuka deipsine.

Telebe na Yakobus arye nyapsine, akunuma.